

Dörflicheichter 2008 - 60 Jahr 1948-2008

Mir Geischer chöme hüür aus Hippygschpängschtl
Mir fyre das Johr drum scho drü Mou Zwänzgi,
Sit Sächzg Johr ohni Unterbruch jedes Johr derby,
Ohni Fasnacht chönnte mir Geischer gar nid sy !

Wenn ar Fasnacht es paar am umegeischtere sy,
De si ganz sicher d' Dörflicheichter ou derby !

* * * * *

Am hüürige Schnitzubankobe tuet üs öppis weh:
Dass mir nümm chöi go singe im Bahnhofbuffet,
Me planet wider einisch näbem Volk verby,
Worum ou sötts bim Bahnhofbuffet anders sy ?

Wenn am Bahnhof guet wetsch go ässe, chasch's vergässe,
Denn scho gly git's dört nume no Fast Food zum frässe !

* * * * *

D' Martina Hingis hett ihri Karriere no mou gschtartet,
Uf ne Tourniersieg hesch auerdings vergäbe gwartet,
Nid nume bim Rütte steit si öppedie im Chlee,
Drum heig si's schyns probiert mit wyssem Schnee !

Bim wösche mit der Zuger Wöschmaschine
Zieht sech d' Martina gärn e wyssi Linie ine !

* * * * *

Der EHC probiert jitz scho zum X-te Mou,
U schiesst am Ändi eifach immer zweni Gou,
Dä Ufschtig id Nati A, dä wär so wunderbar,
Doch nid müglech bi der' Nati-Mafia, das isch klar !

Jetz geits bim EHC zue und här wie bi de-n Affe,
Drum wärde si's leider ou hüür wieder nid schaffe !

* * * * *

Äs wysses Schof graset ufere grüne Weid,
U am Zuhn steit der Blocher im 'ne schwarze Chleid,
Das Plakat do das finge mir drum ou nid doof,
Vor allem erkennt me sofort ds schwarze Schoof !

Ei Tatsach roubt üs würklech fasch der Schlof :
Im Bundeshuus git's e ganzi Herde schwarzi Schoof !

* * * * *

Jo d' SVP tuet bi de Wahle brilliere,
U nächhär tüe si aui gross plagiere,
Bir Bundesratswahl wärde si links verwütscht - oh Schock,
U der Blocher flügt uf d' Schnurre wägem 'ne Bündner Bock !

Der Mörgeli u der Muurer tüe töipele u zwänge,
U der Blocher tuet hingedra stämpfele u gränne

* * * * *

Der Gmeinrat macht gäng meh Vorschrifte i üser Stadt,
Was alls verbote wird, das finge mir nid glatt,
Chasch nümm wo de wottscht ir Stadt parkiere,
Und nöierdings nümm' öffentlech grilliere !

Ob der Weschtwind oder d' Bise ume-n-Egge tuet singe,
Muesch so oder so das Kottelet jitz rouh verschlinge !

* * * * *

Üsi gliebt Cervelat isch jitz i grosser Gfahr,
Denn d' EU wott die Därm verbiete, dasch sonderbar,
Äs chunnt no sowyt, dass ds Brüssel obe die Niete,
In ganz Europa d' Pariser tüe verbiete !

Als Verhüeterli e Chuedarm wär no eis,
Aber es Verhüeterli uf der Cervelat, das wär de heiss !

* * * * *

Jo eismou si mir z' Twann go Fischli ässe,
Die Heifahrt wärde mir sicher nie vergässe,
Mir hei denn doch würklech fasch nüt gsoffe,
Aber trotdäm fasch jedi Schikane troffe !

Die nöii Verchehrsfuehrig isch gspunne,
Mir Löle wärde doch gschyder hei gschwumme !